

四庫全書

集部

欽定四庫全書

集部

吳都文粹續集卷六

七

詳校官庶吉士臣朱理

侍讀臣孫球覆勘

總校官進士臣繆琪

校對官助教臣胡予襄

謄錄監生臣王時發

欽定四庫全書

吳郡文粹續集卷六

明 錢穀 撰

學校

尊經閣記

吳訥

常熟為吳國子游言公闕里公北學聖門身通受業得  
聖人一體以化洙泗以南朴鄙不文之習澤及後人深  
矣癸亥五月訥抱病家居教諭浚儀趙永言奉書謁曰  
常熟縣學創于宋之至和重建于端平之初左廟右學

大成殿後有言公祠祠右有明倫堂元年丙辰永言承  
之是學知縣上虞郭南縣丞分宜李子廉撤堂新之三  
載知縣郭南又撤兩齋改為重屋市學東地建射圃以  
便諸生習射辛酉冬縣丞新建陳澄掌邑事永言曰郡  
庠舊有六經閣吳庠近建藏書樓本學承太祖高皇帝  
頒大明律等書暨太宗文皇帝五經四書大全等集置  
庶下地土卑濕倘得樓閣以藏庶盡其宜貳令善之撤  
堂後寢室捐俸為倡復勸邑人伙助錢米鳩工市材建

閣五間二夾室名曰尊經之閣時縣令郭南公出而歸  
因出俸米完其未備經始壬戌季秋既望落成嘉平之  
月哉生明之日敢求一言垂示不朽然永言讀諸碑志  
心竊有疑宋寧宗慶元己未徽國朱子為知縣事孫應  
時記言公祠後二十八載理宗端平丙申魏文靖公了  
翁為邑令王煥作新建學宮記惓惓然表章朱子記文  
之說至篇終引禮書云時人以典禮質問者十有四皆  
以游一言為可否三代典章之遺賴之以有存焉此朱

子未言者若記中所謂南方之學得其精華及一洒媮  
懦憚事無廉恥嗜飲食之譏此二事文靖公未嘗發明幸併  
開釋以告後學於乎訥早游邑庠睹明倫堂扁左刻新  
安朱熹書右刻會稽王爚立稍長讀丹陽公祠堂記竊  
有得其一二焉按隋書儒林傳序云南北所為章句南  
人約簡得其精華故朱子記稱子游簡易疎通高暢宏  
達意必敏于聞道豈非所謂得其精華者自古而然邪  
又按荀況非十二子篇云媮懦憚事無廉恥嗜飲食是

子游氏之儒朱子于是引而不辨夫子游聖門高弟論  
子夏弟子之學知大學之本治武城知禮樂之道豈有  
荀況所議者乎荀去子游幾二百載其時弟子鄉人或  
狃于習俗遂乃議及子游故朱子記云願諸生勉進所  
謂本所謂道使此邑之人百世之下復有如公者出一洒  
媮懦憚事無庶恥嗜飲食之譏期望後學至深切矣洪  
惟聖朝太祖高皇帝誕膺天命以儒術化行天下即位  
之初詔天下立學校遴儒師訓迪子弟厥後設科取士

以四書五經為主本其四書集註詩集傳周易本義書  
訂定蔡氏傳率皆朱子之說迨太宗文皇帝命儒臣纂  
輯大全凡悖朱子者弗錄今作閣記舍朱子之言何以  
為言哉朱子嘗有言曰道在天下原于天命之性行于  
君臣父子兄弟夫婦朋友之間其文出聖人之手存于  
易書詩禮春秋孔孟之籍至後世國家行事之迹又皆  
有史臣之記凡天地陰陽事物之理修齊治平之道禮  
樂選舉食貨兵刑之制靡不備著于中昔之為師者以



是為教學之者以是為學今學者類多記誦剽竊內以  
傲其父兄外以驕其閭里終身不知自勉而卒就小人  
之歸然豈專在學者之罪亦典教者不知為教之道也  
於乎朱子集周程張邵之成以續孔孟之統當時乃有  
記誦剽竊之弊蓋朱子之學雖不能行于一時而寔大  
行于今日則今日為師為弟子者其可不以朱子之言  
為法為戒以無負國家建學毓賢之意乎昔者張伯玉  
記吾郡六經閣曰諸子百家皆在而不書尊經也夫尊

者恭敬奉持之謂豈徒尊閣奉安而已抑又惟吾邑山水明秀登閣則一覽在目竊慮昧者罔思天朝祖宗頒降經書在上或說讌閣之上下或酣醬之餘追逐笑嬉非惟墮乎相鼠無禮之惡而墮乎嗜飲食無廉恥之賤矣愚也年登八十筆研久廢故是閣之記五年之間屢辭邑官之請今則弗克終辭者蓋欲因是盡悃悞以告鄉邑後進俾勿悖先聖之訓也若夫本武城絃歌之政推廣學道愛人之心此邑之令佐所當自勉以求無忝

其職者然亦耄老之深望云

常熟縣學興修記

徐有貞

常熟蘓上邑也蓋古吳國之虞鄉言游氏之故里也于  
今以文獻稱天下然其學宮雖舊而世敝未之改科目  
雖盛而世風未之振論者病焉先為是邑者率惟簿書  
會計徵科之急而緩于學事成化改元之秋澶淵甘侯  
寔來令是邑即詣學周爰顧瞻慨然以興修為已任乃  
咨于學宮及邑之賢者圖惟載度之而次第營為之以

明年春歲事及秋而文廟禮殿洎左右廡靈星戟門像  
設祭器罔不畢具又明年春及秋乃修子游之祠繼葺  
明倫之堂志道據德之齋建育賢之門闢觀德之圃架  
泮池之橋暨治師生之舍庫庾庖湍周垣坊表罔不畢  
飭蓋自經始至于落成載厯燠涼為日三百有奇而廟  
學規制于是乎稱湖廣參政邑人錢君景寅以書來曰  
願有記於乎興學之舉甘侯惟能之然吾于二三子尚  
有所諭焉夫上之為教未嘗不欲其古若也下之為學

亦未嘗不欲其古若也考其成功卒未古之若者何哉  
豈其為教與學之寔與古異與其在在上者不可詰而在  
下者猶可諉也古之士為道德不為功名不為富貴今  
則或惟富貴之為而已為乎道德而功名在其中為乎  
功名而富貴在其中為乎富貴則出乎道德功名之外  
矣安望其能古若哉夫言游氏天下儒學之先哲而常  
熟之鄉先生也其于孔門以文學為稱首而其言學必  
曰道曰本曰禮樂之原及其行事見于魯論漢紀彰彰

焉然則其為學也豈徒文哉蓋子游之學之道仲尼之學之道也仲尼之學之道堯舜禹湯文武周公之學之道也學惟其道雖窮而在下可樂也學非其道雖達而在上可恥也古如是今亦如是不如是不足以言學吾願與二三子省之由子游以求乎仲尼由仲尼以求乎堯舜禹湯文武周公其于道也若汭流而求源也由一心而運之天下小試而為絃歌之治大行而成禮樂之化庶幾哉其古若爾矣吾願與二三子勉之甘侯名澤

字弘濟以名進士為才御史進憲副敷歷中外以言訕  
為邑于斯其信為復陞也有公道存焉其所資以圖成  
廟者教諭樂安謝紘訓導嚴陵諸倫開封高旦及邑義  
士錢昌劉倣者彥徐暘曾昂也前太史中執法經筵講  
官知制誥奉天翊衛推誠宣力守正文臣特進光祿大  
夫柱國武功伯兵部尚書兼華蓋殿大學士郡人徐有  
貞記

常熟縣修儒學記

李傑

立學教士自唐虞三代已然其制度沿革與夫為教考  
諸經可見矣我朝立學徧天下悉取聖言及先儒格言  
大訓輯錄成書俾士子誦習服行教之之術視古加詳  
故雖遐陬僻壤文風丕振而況常熟為姑蘓上邑密邇  
皇都沾被文明之化最深以久士之育才于學而登賢  
科躋臚仕者獨盛于南畿諸郡顧廟學歲久滋弊弗稱  
具瞻弘治癸丑監察御史劉公奉詔來巡思振士風必  
先學事乃即贖刑之金以為修飾之費廟自聖賢像以



及禮殿兩廡戟門櫺星門煥然維新學自師生舍館會  
饌之堂習射之圃以及碑亭坊表翼然加飾經始于甲  
寅之春不五閱月而告成于是合學師生謂予宜有言  
以紀成績夫祇宣上德以興學為首務劉公是舉可謂  
能盡激揚之職者矣吾黨之士所當自勵以副良有司  
之意宜如何耶嘗聞魯穆叔有言太上立德其次立功  
其次立言立德云者儀範百王師表萬世若東魯聖人  
是矣立功云者若臯夔稷契協和神人以贊化源立言

云者若周程張朱倡明理學以詔後之為學者所以希聖希賢圖垂不朽之盛事舍是三者何以哉常熟自言子游氏北學聖門列于文學之科蓋古之立言而庶幾乎立德者使其大用于時則禮樂之化不但施于武城而臯夔稷契之功可立致矣於乎今之人才即古之人才何子游氏奮于百世之上而後之聞風興起者寡也豈科舉利祿之學有以奪之邪朝家立學教士之意殆不如此吾黨之士知而戒之豈無踵子游之芳躅于百

世之下者哉劉公名廷瓚字宗敬巡歷所至風采凜凜  
爵祿蓋未可量而知縣事澶淵王綸教諭徐朝翰訓導  
王淑陳暢皆協力以相廟學之成者是為記賜進士出  
身朝列大夫南京國子監祭酒前左春坊左庶子兼翰  
林侍讀學士經筵講官兼修國史邑人李傑記

進士題名記

章表

邑學有進士碑碑記邑之進士者也邑之人受業于學  
而得以進士名者試之有司試之禮部試之天子每三

歲而升四歲而一計焉學故有碑函石于宮之壁歲久  
馴隘工不就鐫長邑者下謀于屬募石而新碑之新自  
今始者燭既往而倡後來也後之來惟進士書為進士  
作也書不以齒而以次用表年也某曰某官官至某無  
使視其初者鄙其終輕其少者玩其長也碑石既立矗  
然聳觀碑之中若兄與弟之得與者三予既記之從而  
有所感焉夫士游于學學以從仕曰進士者仕之始也  
士之始仕而書之于石敷之耳目而傳于後者久也必

學與仕終其身求無愧焉可也碑之作幸不致于徒然也此不敢以告邑之士用為予弟兄告也雖然有作于先可以興其後有鑒于昔得以修于今鄉鄰賜履之間有學有師以甚以養視之碑存之于目存之目思之于心學究乎已師取乎人倬然能自待者矣自待者重不苟進于仕仕必尊其學而石又不晦于名之書日見進士之承承齒齒用禪于時不泯泯于後視此碑也碑作于天順庚辰之歲九月之吉式立錢計石費者萬之奇

工計力傭者什錢之四邑長曰唐侯敬身統任厥成云

教育言氏子孫記

袁甫

言偃字子游舊宅在縣治之西唐開元追爵吳侯本朝  
升為公慶元間令孫應時即學宮建祠于明倫堂東偏  
後令遷其祠祀事弗飭有識嗟惋今邑大夫王爚移書  
諭予曰聖道榛蕪心甚愧之今且一新矣東廟西學前  
殿後祠奠薦攸序既順且嚴嘗訪公裔孫則降在編民  
罕修儒業由是即新學西齋扁曰象賢聚言族子弟其

中縣給贍養之資買書延師朝夕訓導擇齒長者主公  
祠宇又慮歲月寢遠美意難繼則為之節冗費得緡錢  
六千三百買田以畝計者四百有五十歲收米以斛計  
者三百有八十庶貽永久願有記焉余嘆息曰是舉也  
可謂知禮矣禮天之經地之義人道之所由立而國家  
所以恃為元氣也昔者夫子與于蜡賓寔有感于魯喟  
然發嘆子游遂問禮而夫子厯言上古中古與後世之  
變而斷以禮之廢興子游凡三問而夫子三答皆所以

極言禮也異時燕居從容子游子張子貢侍縱言至于禮而子游又發領惡全好之問夫子然之攷諸檀弓所載以曾子之任道尚推子游為習禮其裼襲一節則曾子歉然自知其過與他所論禮皆精入毫髮得聖人之傳至于論子夏之門人則謂僅可當洒掃應對進退之志而本之則無然則知本斯可謂知禮此正夫子所以大林放之問而未可以子夏之論小之也且子游吳人也太伯端委以治周禮其源流有自來矣而况講習于



洙泗之間巍然在四科之列武城絃歌之風回視斷髮  
文身裸以為飾者其氣象果何如故子游之言曰直情  
徑行者戎狄之道也禮道則不然品節斯之謂禮烏  
乎一日無禮則自棄其品節甚可懼也故始之創祠知  
禮也後之遷祠廢禮也今王君大修學宮祠先賢而教  
養其後裔于是乎能復禮而言氏子孫藏修其間者又  
能夙夜服習則禮之興也其庶矣乎傳曰禮不明則上  
下昏何以長世然則斯舉也于國祚亦有闕焉是不可

以無述乃為之書宋嘉熙改元四月癸未朝散大夫試中書舍人賜紫金魚袋袁甫記

常熟縣學田記

黃潛

常熟故吳地州之西子游宅在焉當孔子時吳通上國已久北學宜非一人獨子游以身通受業列于七十有七人之間而其言行見于紀錄為甚具迄今千有七百余年生其地而好學能文名者猶彬彬焉風氣之厚俗習之盛誠非旁州比縣之所及然自其縣時已有學而

所占田多薄瘠以歲之不易也諸生往往無所仰食學校之養顧出他州縣下絃誦之聲希闕寂寥前後為是州若職教事者思有以裕之而未知所以為計學之賓老以為州之有力而名好事莫如曹君乃相率造君以為言君欣然為輟田之可耕者若干畝山之可樵者若干畝以佐之羣居聚食始無所乏絕莫不德君之為而願得予文以記之予聞古昔授田建學悉有成法民之為士固不必廩于學官而大家巨室亦不得有羨田以

資施予也自先王之法壞而不可復見說者蓋以為三千之徒聚而食于孔子或又以飲食之人為子游氏之儒何言之無稽邪今之去孔子日益以遠有能聞布衣養徒之事而興起焉可謂難也已若夫為弟子員而藏修息游于斯者皆生于子游之鄉而得其風氣俗習之美者也苟無辜乎居之安食之飽而必有事焉將見其處也必無愧乎子游之文學其出也必無忘乎子游之學道而愛人一簞一瓢不足為其儉萬鍾之祿不足為

其泰孰得以區區飲食之細厚誣君子也哉是用弗讓而為之記以告諸來者云爾

常熟縣學在縣治東南前臨運河宋祥符圖經云縣東五十步有文宣王廟初不言學淳熙十年曾榮建堂曰進學紹熙五年葉知幾改名明倫自書扁慶元三年孫應時建吳公子游祠開禧三年葉凱修廟學端平初王爚倣郡學制東為廟徙吳公祠于後西為學建象賢齋教育言氏子孫扁堂曰明德元陞州國

朝改縣學洪武建先賢祠闢射圃建觀德亭宣德九年知縣郭南修兩廡學門及厨庫正統二年况守鍾修兩廡六年縣丞陳澄建尊經閣成化二年知縣甘澤修弘治八年巡按御史劉廷瓚重修今制左廟右學

吳江縣重修廟學記

陳從古

學校者政本之所自出講禮閱樂習射考藝養老齒胄獻囚告馘無不寓焉詎可一日廢也世之俗吏棄本趨

末鯁鯁以簿書獄訟為急視學校為虛器無惑乎風化  
之不行政本之不立也三代之時家有塾黨有庠遂有  
序國有學人人安于禮義廉恥之域而無暴慢鄙俗之  
心故孟子謂學則三代共之皆所以明人倫也人倫明  
于上小民親于下可謂知本矣自子衿之詩作士子競  
為城闕游渙然無所歸宋興尊儒隆道州縣率詔置學  
自漢及唐未有如祖宗之盛者也中更兵火之變一時  
學舍莽為盜區浙右尤甚吳江界往來之衝六龍南渡

駐蹕臨安寔為畿邑士大夫行李取道半天下使客旁  
午曾不得一夕寧為邑者平旦視事操牒據案獨臺符  
府檄金穀趣辦之後是憂至學宮廢弛漫不經意故民  
不知教簪筆健訟視他邑最乾道之初乏宰再歲郡擇  
人以攝之席未煖即去知縣趙公領事之始慨然嘆曰  
吾為風化之首今學校鞠為園蔬邑之父兄鮮以夫子  
之道詔其子孫甚者先聖殿廬上雨旁風春秋奠菜無  
所存庇此令所當憂也前政石公轍嘗創之矣未幾中



輟吾詎忍不終其事也卜日鳩徒撤舊更新夷荒剔蠹周以重階堊以兩廡中奠廟室環列繪像生師有舍禮器有所賓客之廬庖廩之次無一不具公曰學具矣無資財以養士徒學為于是將舊籍漁兒月計錢二十萬永為廩餼之費凡片瓦尺椽市于旁邑不告勞丞俞希尹寔贊其事經始于乙未之秋落成于是歲之冬邑之羣士鼓篋懽趨以後為恥絃歌之聲夜以繼日公又嚴規程以防其怠者則公之慮遠不為朝夕計蓋可嘉也

吁學校之設不徒設也世知甲兵可以威天下不知學校亦足以威天下蓋甲兵威之而不足學校威之而有餘昔朱泚之亂士皆風靡何蕃以布衣能一叱而回六館之士孰謂學校無益于人之國哉今諸生宜以古學為心不徒為章句誦說之習異時孝于家忠于國無負聖天子教育之意則所以報公者亦無媿矣予吳人也往來彼數矣見其水波溟渤羣山映帶遠混天碧長橋卧波橫截其中固嘗倚櫂岸巾徜徉四顧曰脫屣功名

扁舟五湖豈非鷗夷子皮之遠遊者乎秋風颯然蓴鱸  
芳鮮豈非張季鷹之思歸者乎行歌長吟興渺雲水豈  
非陸魯望之嘉遯者乎大抵山澤英靈之所萃其寓于  
物也必有瑰竒雄傑之觀其毓于人也必有高明俊秀  
之才然物不自顯待人則顯才不自達得人則達彼之  
為瑰竒雄傑之觀者得三賢然後發明所謂俊秀之才  
為時而生者今有待于學校作興也趙公既建學矣則  
才之所成就者吾知必有人焉公名廣字德儉屬籍之

賢有文者其為政之本末又能推餘力以及郵亭使館  
橋梁祠宇一新之部使者以能聲交薦于朝今為南徐  
別駕公雖去邑之人不忘公賜相與請記于予欲刻之  
學石以告後人予嘉公之政如此不敢以固陋辭淳熙  
五年五月十八日朝奉大夫直秘閣新權知饒州軍州  
事兼管內勸農營田事陳從古記

重修吳江縣學記

盛章

嘉定十年十月吳江重修縣學僦工邑之多士合辭來

言曰學舊有宮歲久就壓曰殿曰堂前令嘗葺之力未逮以其餘遺後人令呂君宰邑謂是為政之大者首集僚佐謀其議克合乃節嗇銖毫月聚歲贏市材僦工厯吉丕作授成學職俾以分領向所粗備增敞加飾既益嚴翼門廡齋舍撤陋崇庠屹為闕閼雖廩庫庖湍曹胥之局興隸之所斬斬一新于是率同僚從以士俯仰再拜致敬于先聖先師冠裳韋衣環列後先雍容般辟濟濟咸在觀者侈焉願有以記之章叨居言路天下事無

巨細得以商略可否日以酬酢未暇既而復來言曰今之為邑簿書期會獄訟聽斷非才識精敏不能辨詰此其所難也賦斂有常額外鑿空漁以竭澤後反求多日對疲民較量于圭黍尺寸之微不則繩以法雖不忍所不遑恤此又難者也今令能于敲扑喧囂之中知所先務豐宏茲學以幸邑士且役成而民不知此尤其難者也請益堅不得辭因為之說曰學所以明教化美習俗也古者學庠序塾無非此理身修而家齊家齊而國治

此學之所以及乎人也自誠而明自明而誠極而至于不可測之神此學之所以合乎天也吳松為邑地占其勝自昔高人隱士徜徉其間清風峻節聞者興起世降俗下趨尚浸異士之重厚誠篤或隨習而遠民之和順輯睦或怵欲而虧思返古者每致其拳拳也然厥初有生畀賦均一是理苟明轉移易易今教養之地鴻敷魚輪威儀文物設飾宣備俾邑之秀民得以優游涵泳于其中飡和染教以成就其遠大之器業田里之內聞風

向化亦將有所勸勉媿恥而乖爭陵犯之習浸以消沮  
蓋人心之理本與政通以齊魯待其人則人亦以齊魯  
待其身其機固如此也令之加惠吾邑顧不厚與章既  
書其事抑有告焉夫人之心不難于觀感動化之速而  
難于持循蹈履之久使士之尊德樂義積于其身者猶  
長日加益而不自知民之入孝出弟日以遷善而無復  
犯禮之俗相與守之而不變則國家崇化道民之意始  
為無負且有以答令之盛心矣其勉之哉呂君名祖憲



婺女人心事平夷政尚簡靜其學問源流蓋有得于伯氏東萊云冬十二月望日承議郎監察御史盛章記

重建儒學記

錢牧

余試令吳江越兩載有壞必葺不敢以傳舍視官府每于日不暇給之中左枝右梧興利補弊驛亭橋梁以及公宇經理粗就緒獨學宮無廳事至則僑寓聚星之津亭環堵瀕湖規制淺狹僅可為蘧廬旦莫之托嘗欲擇曠地屋其上俾挈而居之以稱朝廷設官之意會邑計

兄雜道傍作舍此志未償也上踐阼之二年丙寅夏五月荆溪楊鏌來領學事顧瞻聚星代者猶未去東寄西泊靡所居止一日庠校之士過余道所以余曰此令責也二三子之意不可孤邑之後河舊有吏舍一區嘗假務官居其中去代不常至有撤樽櫨抉窗戶負之而歸者四壁罄垂日就頽圯無已則起而新之輒以為學官廳不猶愈于津亭之僑寓邪乃命置材植具瓦甃相率庀徒補苴罅漏興仆植僵不旬浹而工師告成治事有

廳肅賓有位藏修有堂庖湍有所一畝之宮具體而微而邑庠師儒之官得之已不翹足而余之始志亦可粗償矣竊惟國初崇文詔郡邑立學館吳江寔居其先然主管學事例以縣官兼之自祥符以來大率然也三數年前有持提學司片紙以白衣來典教者餽廩之外月書季考若罔聞知先皇帝加惠四方學徒景定壬戌昉置為令凡縣悉置學官所以俾之專意教養以幸邑之俊秀者至矣使為長于斯猶苟焉旦暮坐視其東寄西

泊不獲安其居豈朝廷專官之意哉矧是役也取辦于學帑者無幾賴以居今比後者則無窮嗣而葺之尚有望于來者云是歲六月既望奉議大夫特差知平江府吳江縣主管勸農公事兼兵馬都監弓手寨兵軍正賜緋魚袋錢牧記

新修大成殿記

陳堯佐

道濟萬物而萬物不知其所以然故聖人條其教而教之教之弗率而又以刑而刑之由是君于上臣于中民

于下尊卑貴賤儼如也故禮樂征伐自天子出後之學者或曰吾師佛也吾師老子也復又有百家之說穿鑿戶牖于是教分為三流析為九烏乎教果三乎流果九乎且未論佛何為也老子何為也言之彬彬書之云云是欲化之為善乎果欲善也則孔子之化不使人不善矣水濟水也安得而異曰江曰河曰渠曰溝名斯別矣體復二乎且夫生而免乳必諷其言死而就木必不可須臾而去也雖欲去之有能去之者乎或者北其轅而



騁越西其流而走海蓋有之矣未見其至也復之上六  
迷復凶予謂迷復之凶又誰咎也國家紹千載之統炳  
二聖之業東封泰山答天之休也西祀汾壤復地之利  
也而且謁見靈闕飲至宗廟噫為禮之盛有過于此者  
乎為孝之大有過于此者乎多士討論之聖君財成之  
明白光大垂耀永世夫如是則孔子之為道也不為不  
尊矣孔子之為書不為不信矣王者尊之率土奉之適  
其宜矣又安從而他師焉姑蘇南門邑曰吳江乃錢氏

武肅王之所建置疆畫長洲之苑門涵震澤之源魚鹽  
蜃蛤既邀逐末之利詩書禮樂遂昧好學之訓會詔下  
郡邑悉煥儒廟縣令李恭尉聶復等喜而言曰由已而  
為專也專則有悔自命而作順也順則無咎既而營材  
具工補壞繕廢棟宇之制遙資乎闕里俎豆之設仰法  
乎太學門人僦僦書室鱗鱗蚩然之氓于斯改觀卓爾  
之士可以弗畔又若尊篚之器縣官具之奠獻之數朝  
文著之雖顓蒙者視之瞭焉茲又上之化下以道而下

之奉上以禮可以亘萬古流頌聲于無窮也予竊大君  
之祿被外計之寄錢刀之司寔曰已任俎豆之化人匪  
他務會按厯所部戾至新宇唯令及尉趨而言曰天子  
有命執事不佞廟成弗識歲遠何覩願得正人之論以  
刻泰山之石予聞其言而喜當請而諾蓋喜乎播吾后  
錫羨垂鴻之慶亦樂乎揚孔子垂教化之旨黡淺之說  
孤陋是懼或曰三教九流之道果何如也三教不二九  
流歸一吾子思其異不異也宋大中祥符五年歲次壬



子仲春十一日陳堯佐記

重建大成殿記

黃由

祥符五年二月吳江縣始建學丞相文惠陳公堯佐為  
兩浙轉運使寔記其成當是時宋興六七十載海內無  
事文治大興詔郡縣悉置學守若令得祀夫子令李度  
築縣西偏以奉詔書規制軒偉廟貌遒嚴俊語明章相  
為發揮學校之盛稱于二浙既厄于兵令石公轍乃改  
而南大成殿之建距今又七十載棟橈椳腐聖繪漫漶

春秋釋奠觀者太息令劉伯麟輦錢五十萬議治不果  
今令孫君仁榮初拜學宮有慨于心義劉之為願竟其  
役于是捐金靡穀至割圭租躬執扑略無留難明年夏  
六月已成簷楹飛敞像設一新承平氣象宛然如在由  
有園百畝撫上所賜詔墨是名盤野幸與學鄰扁舟過  
之輪奐奪目乃載酒為諸友賀席間人人言令君之賢  
豈弟不擾百廢具興未幾皆及吾門且述所以嘉惠鄉  
校者謁由書之由再三辭不獲則進諸君而告之曰學

之廢興時也道之窮通命也惟不以窮通二其心而一  
以救時行道為事此吾夫子所以異諸子也至于今名  
教被于四海祀典垂于百王其于啟人心惠斯世者蓋  
與天地相為無窮豈直籩豆司存歲時奠謁而已吳江  
壯哉縣水天寥濶清淑扶輿數千百年間豈無長才秀  
民行夫子之道于世顧使高人隱士脫身世鞅者多擅  
茲邑是豈夫子詔吾黨之意哉夫沮溺耦耕晨門荷蕢  
謂非知幾有道之士則不可夫子奚不深取以為世道

計也噫出處何常惟義之歸屑意軒冕顛倒利害之途而不知返固非也忘斯世獨善其身將與孰任天下之事轍環諸國削迹伐木夫子有不得已于此者矣諸君勉之入宮牆拜冠履而念及乎此則通經學古期于有用得時行道思濟斯民皆聖門事業無徒徂于章句之學此則由之願也亦令君所以尊先聖淑艾吾黨之意也語曰十室之邑必有忠信不如丘之好學也諸君勉之嘉定八年正月十五日正奉大夫提舉隆興府黃龍

萬壽宮寶謨閣學士吳郡開國侯食邑一千七百戶食  
寔封一百戶長洲黃由記

重建儒學記

朱子昌

吳江平江之屬邑有太伯延陵之遺教故其俗淳以厚  
有鴟夷子皮季鷹魯望之高風故其士清以逸有三江  
五湖之形勝故其地為古今之雄盛予曩奉三高祠徘徊  
學宮摩挲石刻觀陳文惠公所記則知此邑學校蓋  
甲于吳之諸邑自大中祥符已然紹興改創規模宏大

風驚雨過蕩不復完所僅存者大成殿講堂而已鎮國  
上將軍都元帥甯侯玉葺而新之自至元癸巳八月鳩  
工正殿始復相是役者敦武校尉杜福然講堂齋舍未  
及也是邑王令君柔勇于為義以明年八月與邑之長  
貳復倡士民捨其舊而新是圖講堂廊廡齋廬下及倉  
庾庖湑之室具備前學錄俞處仁儒林偉士也捐金繼  
粟賴其力為多落成後教諭王沂李文遂合辭請記成  
績予謂承流宣化之職也政教繫焉漢言循吏以西都

為稱首龔遂渤海黃霸潁川不以柔服強暴為能則以  
發摘奸伏為事文翁治蜀其治辦之迹一無可言不過  
興學校教生徒而已班孟堅傳循吏顧乃列于龔黃諸  
人之先豈非詩書義禮之澤入人也深教為政之本顧  
有在此而不在彼歟是邑當驛道旁午往來仕于此者  
於將迎中不至廢事亦云可矣何暇他及有能以興學  
校崇教化為先務者亦可尚矣士之肄于斯者其可負  
所學歟泮水為頌僖公而作修泮宮一事不書于春秋

而見于魯頌蓋泮宮乃因魯舊有而能修故春秋不書然魯人頌美之辭在聖人所不廢也余職儒司因士心從輿論不容以蕪陋辭時元貞元年九月將仕郎浙西道儒學副提舉朱子昌記并書

重修吳江州儒學記

顧儒寶

孔子曰人能弘道子思曰道待人而後行道無在無不在所以擴充之者存乎其人矧夫子宮牆宗廟百官之美富莫非道之攸寓惟其寄之于人故有作焉有敝焉



有修焉夫作于前者固不能必無敝敝而修之則不無  
望于後之來者鄭人不修學校無以迨佻達城闕之譏  
魯僖能修泮宮有以來思樂采芹之美一修一否豈非  
係于人乎由是知作者未必無修者未必易也吳江有  
學與州同陞初都元帥甯公玉縣尹承務王公柔因其  
敝而共新之迄今三十有餘稔所修者復敝焉延祐丙  
辰知州朝列高公仁甫下車首謁先聖環視內外慨然  
有志于斯計費捐資無需于學自為謀畫期底于成明

年丁巳新靈星門增儀門二大成殿明倫堂廊廡四齋  
大小兩學瓦垣甃地夾道植槐倉廩庖湑罔有不葺越  
明年戊午于正門外濱河累石疊牆映帶左右昔無今  
有觀瞻聳然茲斯役者州吏沈懋前直學沈廷玉也既  
而聖賢像貌彰施一新公之志亦惓惓矣尚猶不寧于  
是月講季試躬親臨董大小生員勉勵尤至抑嘗論教  
化為政治之本世之牧民者往往詳于政治而略于教  
化公之斯舉可謂知本矣苟非其人道不虛行是學之

修信乎其有待也訓導趙繼祖曹謹偕學職弟子員謁  
予記其成刻辭于石以垂將來公之得士心如此儒寶  
辱公之知茲幸滿替曷敢以固陋辭時延祐五年歲次  
戊午前平江路吳江州儒學教授顧儒寶撰

興修儒學記

陸居仁

吳之境以水為勝水之勝在震澤三江之交震澤西受  
天目宣歙諸山之水東趨三江以入海故澤江之交其  
境為尤勝交當南北要衝有虹梁亘數里逕交上通驛

達達左為運渠兩傍居民數千家在宋為縣今為州蓋以鎮其交也州學在其渠東西面震澤山水之勝一覽而無遺長江抱其隈是學又據一州之勝者第學址隘陋又廩粟薄歲久而隳靡措改觀資至正庚寅燕山邵侯子敬守是州莅學拜謁顧瞻咨嗟慨然圖新之首捐已俸為倡秋八月上丁釋奠率郡民之富而好禮者觀禮既徹俾升堂與燕享以介景福郡人喜曰吾乃今日知禮樂之教也是侯欲厚我州俗吾民何幸也願相勸

為善侯曰凡爾之同室而居有父子兄弟之親夫婦之  
別同里而居有長幼之序同類而有朋友之信主僕而  
有君臣之義者固彞倫之同秉然微吾聖人述經垂訓  
以為之教國何以遵為常法民何以質為常典而得相  
養以生相安以居邪賴其教而不知所以報之無乃昧  
其本乎夫學校尊崇先聖先師春秋朔望制為祭祀所  
以報其本也設之師儒以鄉三物樂育羣才所以布其  
教也今敝陋若此何以稱崇教之意吾將擴而新之以

致其報之誠以漸爾禮樂之儀爾民亦願乎民咸稽首  
曰微侯吾幾不知民生之所由賴猶敢後其報乎乃相  
率以來助於是大闢舊規廟貌神像華奩莊好高其閑  
閤加倉庾廟學於是告備起是年之九月三日乙卯至  
明年辛卯五月十二日庚申學觀一新而江山之勝若  
有增偉者學職郡之民交為請記于是記曰信哉善政  
不如善教之得民邵侯俄頃之教而民即從化學校為  
之興起使久其任而教不輟為效可勝言邪昔者召公

化行南國而封於燕今侯生於燕而欲召公是似雖南陽召父何足多讓哉今守令六事興學為要若邵侯之政可謂知要矣雖然以興學為心相是役者不以利己為心故學之成也偉士之講業於學者相觀孫志而以侯之心為心則業之成也是州當驛遠使驛之過無虛日覽江山之勝瞻學觀之偉挹士風之懋必有舉麾而指之者曰是燕邵侯之甘棠也走也敢不為斯文慶至正十一年五月前鄉貢進士陸居仁記

儒學大成殿記

許從宣

按周制大胥春入學舍菜合舞秋頒樂合聲故凡釋奠必有合也其登歌清廟下管象舞大武是也故月令仲春上丁命樂正習舞釋菜蓋學校以行禮樂小有舍菜而以食為主大有釋奠而以飲為主其于學校習舞與聲大合六代之樂一也吾夫子以聖人享南面王爵歷代尊崇禮頌之縟情文之備至于今而莫之能尚也唐貞觀間太宗以文治然廟享聖人襲用齊典僅設軒架之



樂六佾之舞而已繼後開元間釋奠始用宮縣之樂至于故宋崇儒右文可謂至矣然春秋上丁釋奠東序上戊釋奠西序雖登降有部至于用樂不以軒縣而以判架兼不設舞位先儒謂有歌而無樂非古人習樂合舞之意也遂乞釐正以表尊崇至于唐儲君其釋奠于學鐘磬篳篥絲聲在絃匏笙並陳祝嘏合止賁鼗間作塤箎和鳴具有成規禮將陳協律郎俯伏舉麾則永和之樂作登歌則肅和之樂奏雍和舒暢悅人心而娛神明

者其為樂可謂盛矣。今夫路府州縣莫不有學，其所謂尊崇聖人者，衣冠章服，殿寢階陛，固已純乎王者之禮矣。若夫廟樂八音並奏，蓋有取乎虞廷之簫韶，豈不曰後世雖有作者，虞舜氏不可及矣。吳江之為州也，雖于吳為南北津要，然州治出乎江湖之上，風濤所掀播，魚龍所出沒，而州學迫市里之隘，在垂虹橋之南，廟享聖人，既有著令，學宮與廟雖皆具，至于廟樂則有缺焉。至正十二年，州達魯噶齊哈蜜勒人濟雅濟公以奉議大

夫來監是州既建戟門以大廟制額命樂師選學之彥  
肄習廟樂甫及期而樂大備自凝安曲九變成章與八  
音並奏而無纖毫敢略者廟于是告完蓋公之來是州  
也適寇犯鄰境州民憂惶而公能鎮之以安舒撫之以  
仁厚狡猾從化奸兇伏誅民既大和乃能以其餘力重  
製廟樂成奉議大夫西夏郡趙拜布哈以首領來尹是  
州同知金剛納昭信哈智承直判官諾海敦武哈扎爾特  
穆爾從仕提控案牘錢惟賢都目陳濟顧能與公同志

協心興學造士州澤國其人士之美者來遊來歌者觀  
感廟樂以矢其音況當大比之年其為世用必矣若夫  
琴瑟在御笙歌間奏且將見蛟龍黿鼉秘怪水獸與仰  
秣之馬出聽之魚咸感化于廟樂之盛者而況于人乎  
況于鬼神乎至正十二年癸巳十月吉旦亞中大夫福  
建閩海道廉訪使許從宣記

吳江縣重修廟學記

趙寬

國朝之制縣必有學學必有廟天下皆然然有修飭者

有荒陋者各視其地之文獻及作興之人何如耳學所以明人倫育英才欲其寬閒靜深以為士君子進德修業存心養性之地廟所以尊祀聖賢報本追遠欲其高明嚴肅然後人望而敬有以興起夫景仰企慕之心吳江廟學自宋元有之正統中巡撫少司空吉水周文襄公始拓其基宇而改甃之規模宏敞他邑莫及也厯歲既久日以頽廢弘治戊午春寬以刑部郎中奉使湖南便道鄉間祇謁先聖廟庭顧瞻宮牆周覽區宇輪焉奐

焉鳥翼翬飛丹雘焜煌照映雲日殿曰大成門曰列戟  
曰靈星祠曰鄉賢曰去思堂曰明倫齋曰日新曰時習  
以及神厨神庫膳堂射圃學官之居諸生肄業之舍倉  
庾庖湍之屬昔之卑庳者今則增以崇昔之毀敗者今  
則完而新昔之圯漫者今則潔而明衿佩之士絃于斯  
誦于斯藏修退息于斯皆得以安其居靜其慮大肆其  
力于詩書禮樂之場而無喧囂之雜湫隘墊濕之憂予  
喜而問曰孰為之哉何若斯之盛也衆咸曰此吾邑侯

之嘉惠也吾侯下車首務斯文近日司宰牧者所未見也予因問繕工之始末曰侯以丙辰之冬來至任經始于明年暮春之初訖工于孟夏之終問經費之所出曰取財于官而役力于民民欣然趨之命陰陽訓術吳鑑敦匠事鑒公勤有幹略長于料理學諭高君督視之尤加意焉故其成速而精予聞而嘉之侯之政豈不異哉侯以進士釋褐來宰邑視事之初錢穀獄訟案牘山積宜若不遑他務者乃能從容有餘以從事于教化之地

其才力優于人遠矣世之好興事者厲民惡勞民者廢事今也有子來之樂而無疾首蹙額之怨此何以致之哉秉彛好德人之同心矧吾邑故文獻者侯因民所欲而使之宜奔命之易也教化行而風俗美思樂之風作而棧樸之士興焉必自今日矣高君與司訓林君陳君聞予言請書之將刻貞石詔來者予辭不獲遂書以歸之侯姓郭氏名郭字于蕃廣平肥鄉世家也廉明嚴肅達于政體治邑一年而良法善事具可稱述不獨興學



之美云

吳江縣學在縣治東南初有文宣王廟在縣治西宋  
大中祥符間詔天下修廟學縣令李恭尉聶復始作  
新之轉運使陳堯佐記慶厯七年縣令李問尉王庭  
堅欲重建勸民輸錢數百萬會詔止不果乃以其財  
建長橋元祐間知縣程端始竟其事建炎間兵燬紹  
興間知縣石轍即東門外開江營舊基改建邑人王  
份獻地廣之即今址也淳熙初知縣趙公廣拓其地

建齋三十楹歲入米幾千斛錢若干以給學費嘉定  
八年孫仁榮重建大成殿宋季悉毀于兵元至元十  
三年都元帥甯玉校尉杜福重建殿宇塑像三十一  
年知縣王柔建講堂齋舍元貞二年陞縣為州改州  
學立四齋大德二年教授謝啟東建兩廡繪從祀諸  
賢四年知州李玘建靈星門延祐至正間知州高仁  
孔文相邵子敬達嚕噶齊濟雅濟相繼修之國朝洪  
武二年仍改縣學定為齋二正統十三年周巡撫忱

朱守勝隘之徙左右民居以展宮牆景泰六年知縣  
賈亮建廟于堂左弘治戊午知縣郭郭修今制左廟  
右學

嘉定縣建學記

沈璞

士生斯世抱負豪傑絕特之資固不待文王而興者至  
于中人性蕩涵易流雖曰秉彜好德亦必因物有遷苟  
無詩書以為砭劑無禮義以為繩墨則頑愚鄙野老死  
與謀沒沒與草木俱腐自古及今何可勝數使遇真儒

碩德以為師友則漸摩誘掖開導激昂誦說乎六經百代之書究明乎三綱五常之道涵茹今古嚆噐道真學足以充其資才足以伸乎世一旦舒華揚英展采錯事建大勲業立大名節澤流四海事光千載不亦偉歟今焉身為幸民地隣京國耳接鐘鼓笙鏞之音目見黼黻文章之盛名師益友講道授業者代不乏人然則爾士非學而奚務國家列聖相承右文尊儒度越前古車書萬里聲教四達至于要荒蠻蠻之域悉置學宮以專教

養猗歟盛哉吳會今股肱郡嘉定為邑寔崑山之東境  
地連江海炊烟孤迴往來蒲葦間故多盜田里為之繹  
騷土豪大家或怙資憑強輕死冒法窶弱若益困豈教  
之未至歟嘉定十一年邑始創令尹高侯衍孫基之其  
明年春營學宮乃度地于邑之南面勢軒豁規模顯赫  
士民翕然殿堂門廡落成高壯華美廟貌祭器庖湏齋  
舍罔不備具于是父兄詔其子弟負笈抱經相懽以趨  
乃立子弟員有倉廩以充其食有課試以較其藝彬彬

乎鄒魯之風矣學成迄今十有一年而未有記邑士為之請僕淺陋不學不知為文然惜前人經始之勤久而未彰不敢固辭夫吳會之地非延州來季子之故國邪禮樂遺風猶在茲邑析在崑山崑山衣冠之富為吳最其間佐鈞衡秉節麾者背項相望是邑同一封畛同一風氣爾士其毋棄暴務修潔博習以求合于儒有司勿鄙夷其民務尊吾道使沈浸涵泳期用于世異時來學之士將有躡魁躔登顯任以光耀其閭里豈若鄭鄉校

徒議其執政而已哉於乎高侯奉天子命以作新于茲  
邑固職也然畢力殫慮事不可以泯沒相其役者二士  
曰陳鳴一何夢龍皆力問學厲操行乃以身為邑士倡  
凡程工度材寔尸其勞故併書之使刻于石宋紹定二  
年中秋日

嘉定縣學記

林應炎

學宮以崇先聖厲後覺也公宇寧儉校庠序古有制雖  
斗邑無敢不備嘉定邑學叔三紀齋可肄堂可踵殿翼

以庶可拜可趨來遊者尚陋之然廩斛歲裁三百半  
蠹于遙領職員議斧藻匪易應炎戊申秋始至士翕然  
告顧邑計窮空靡克佐費于是挾貴挾故以職員請者  
謝弗與今月有學給辭勿願均擢寔搏浮銖積鎔累明  
年夏作中門壯以釘鑲森以戟飾又明年作直廬楹二  
十有八塑容漫漶久缺彰施又明年外作重門彤其牆  
以衛表所入坊扁曰興賢橫疏清泚植槐于旁警設鼓  
講設席祭為設服庶事視舊粗飾力所未逮猶多合數



役粟費斛五千餘緡費二萬六千餘皆國學生龔天定以直學董其事典計則有邱煥發張惟一先後焉末邑風尚近市繫于好競甚俠駟于操贏甚誦也樸之犧尊山疊華之逢掖章甫日邁月征耳濡目染稍稍賣刀折券而衡泌有絃誦聲捷貢版鳴園橋邇歲增見何文也天賦地產知不于此乎秘俠者剛之惡誦者巧之偽銷其惡使善刻其偽使真是機括安在令為多士先士為四民首惟簡御煩尊士之秀選俊以勸導衆異不難一

也惟賢詔愚迪愚民之農工商以信向兼善不啻獨也  
學宮其令問政士議政一大統會之地歟然而昔缺略  
士謂令奚以教令繕葺令謂士奚其業佔畢迹也彫篆  
技也科級外物也士于學宮猶家然身家是孰若心家  
是心無他法自主敬始常惺惺其存養活潑潑其形著  
是心苟存則學宮令之沂泗楹夢非奠廟貌非像真見  
乎端冕而南面夫子坐如尸振佩而環侍諸子立如齋  
而吾身即賜于牆由于門外堂不遠伊邇乎淵之寢道

豈茫茫無下手處哉如其朔而謁旬而課二丁而祀身  
退心隨之邑人將曰青衿挑兮是豈墨綬者所望時宋  
淳祐<sub>某</sub>年夏五月<sub>某</sub>日

嘉定縣學重建大成殿記

林應炎

國家自慶厯詔州縣立學必祀先聖明尊師也兵始黃  
帝農始后稷社始勾龍莫不庭焉壇焉祀之學雖一畝  
地無夫子宮牆可乎有之矣苟其日月徂邁風雨漂搖  
可乎今茲邑適與壞會弗動弗治是吾道反不若異端

者流其龕廬像設金碧稍漫漶即百千為羣奔走謁資  
求所以還其舊今天下固無富縣而如曰吾方治賦聽  
訟姑舍是則朔告丁奠仰梁而摧俯柱而腐于心何如  
哉嘉定朔學未五十年大成殿寢圯令桐川守常君懋  
為宰請于府得沒官田租市木瓦甍將召匠以畿幕行  
史君俊卿踵其後至則鳩工度材斧鋸交作始乙丑春  
仲閱五旬殿宇顯敞廟貌崇嚴有門靈星有橋跨水主  
學唐均夢翔佐其決學正王子昭相其勞為工千一百

五十餘楮六千九百餘米石三十餘既告成邑士相與  
言曰物之成與壞者數也能俾壞復成者人也今茲常  
君規之史君隨之一新是殿矣繼今以後安得復如二  
君者捐已俸倡諸寓公使是殿久而常新者哉且尊師  
有殿而養士無廩柰何史君遂撥其功德寺田七十六  
畝有奇曰是為後之繕修備給縣之廢庵田六十二畝  
有奇曰為士之供億用于是邑士嘉常君之始謀感史  
君之終惠以予常籩粝是邦也合辭請紀歲月余惟唐

陸衡山為縣人立宣聖廟堂少陵過而詠其事余老矣  
弗克賡少陵作為邑士賀辱徵文其敢以蕪陋辭時宋  
咸淳二年夏四月朝散大夫新除秘書省著作郎兼國  
子監司業林應炎撰

嘉定縣重修廟學碑

并銘

王遂

乾道戊子先君吉州筮仕崑山尉奉大父敷文以行時  
敷文南定湖湘北守淮楚強敵奪氣退居金壇買書數  
千卷聚子弟以學有詩寄子庶勤不可纖毫累歸來使

我家中錢可謂仕教之忠矣後縣裂為二以練溪之東  
為嘉定縣踰七十六年弟選被命典邑曰祖父舊遊何  
可不力載銀米糗糧自隨朝坐琴堂不夕不休訟于公  
者手自裁決負于私者寬期以償月輸歲送毫髮不私  
吏無所措手行道頌之惟是縣之學自令高衍孫始而  
養士之費纔百石鄭提舉霖繼之增百石有差士始來  
學有與薦名者其後廢壞而選至首以縣橋厥路不直  
乃命改作榜曰登龍得池元堅開講周夢虎主之其來

講授者皆給之食凡有志者會食而宿于學四經之集  
來與而課試高下不輟增其小學三十人迎師以教之  
縣給之帖糧不繼請尊勝廢田于提舉得畝僅及二百  
者亦稱足徐知府鹿卿以田四十七畝繼之時講堂更  
叔昂新寓公周君次臯首助其費邱君斌龍君廷瑞薛  
君埴王君子昭孫君繼周吳君炎共相其成如其家事  
自殿及門廊屋三十三間其外則以朱文公舊刊金壇  
縣學者刻于門講堂則以袁蒙齋所書明倫堂扁示其



齋取建寧學宮所以命諸齋者名之規約咸具修葺未  
備者一切略治計三萬四千餘緡米一十五石未嘗有  
取于吏胥牙儻而從學者欣然是歲有與薦者以遊學  
而與名旁郡者以上書賜第者其試入太學者一人有  
以辭賦與魁選咸曰登龍之效也會選第受代與諸公  
言者曰諸公之進德也如是此非選謹守祖父之力也  
亦諸公共成之耳繼治者湯公仕龍吾鄉里敏肅諸孫  
有不待勉而趨也無疑矣其可無以告謂遂曰兄退居

邱園于世事無所及獨于邑之大務胡可無言乃即其事而銘之銘曰明德自始兮制起虞庠逮我聖朝兮化行縣鄉伊吳有邑兮在海之旁始置文字兮士風乃昌帝命立學兮謀不暇詳令弟製錦兮于先有光翼翼濟濟兮明倫設堂有奕斯橋兮渡水之陽俎豆莘莘兮頌詠琅琅朝講四經兮夕以為常登名天府兮辟雍翱翔諸公合力兮講習日長令雖去此兮士胡忍忘俾我後人兮愈大以章益修厥典兮永有馨香

嘉定州修學記

楊維禎

嘉定古婁縣之析也國朝陞州孔子宫亦從而大之在  
州南一百五十九步基于宋縣令高衍孫大德辛丑儀  
門圯于颶風至大庚戌守王鐸改叛明倫堂大厯己巳  
守趙道泰重建大成殿移堂殿之南士論病之擬遷廟  
東厯守數十而不能更閱三十餘年天將興之固先廢  
之至正丙申堂燬明年兼攝州事者太尉府分帥張元  
良以教授陳公禮之請謂時論雖急兵而吾庠序之教

綱常所係不可以一日廢也于是搏節浮費及勸率力義之家募貧丁相什伍填淤池成址若干畝甃石隄捍水若干丈構新堂其上前接崇軒旁翼齋舍立教官廳于西舊西齋地也遷學廩于東舊東齋地也與夫直廬庖湍之所靡不新焉惟先聖龕帳與大成樂器泮沼儀門未具教授陳公禮復請于貳守鐵侯張侯州倅賀侯遂相與完而成之追理學祖以廩生徒廣購書籍以資經訓禮致五經師使日與弟子員討辨道義磨勵忠孝

蓋不鄙夷其民實將責成于作養之餘以應賓賢之所  
需也豈徒輪奐其宮以務觀美哉張侯于政尤明治要  
與予有疇昔好使典書者王友諒走書幣請記且曰先  
生老文學幸有一言以諭諸學者予辭弗獲則告之曰  
三代之學之教心而已人心正天下無不治未有不正  
人心而能治天下者也堯之授舜舜之授禹成湯武王  
之建中建極同此心也當是時比屋有可封之俗人人  
有士君子之行人同此心心同此理也上之人作之下

之人則之以心感心以理應理固不俟夫威驅勢迫也  
世教衰人失其本心至或淪于大惑君子救之亦曰治  
亂不一而心無不一尊君親上之出于天者未嘗滅沒  
也言教者教以聖賢之心身教者教以聖賢之行況其  
為州來子之故壤禮義遺風猶有漸漬之地乎民不從  
治吾不信已請以是復司教者司教以復三侯時助學  
田者楊谿楊仁增益其所未備者三山林震林復也邑  
侯名特穆爾布哈字德剛國族也張侯名經字德常世

家金壇宋中書舍人恣之後賀侯名撝字守謙西山居士仲之子也張師字子讓州人教授字子約河南人兄祖仁壬午科狀元提控案牘廬以仁都目宋思讓陸元祐皆有力于文教之事云至正二十一年辛丑歲二月朔旦會稽楊維禎記

重修宣聖廟記

嘉定州儒學以書抵余錢塘官次言其州太守郭侯之善治也先務以教化為治本至正壬辰夏侯由中臺監

察御史歷工部員外郎遂膺守令之選于是州先是為州者咸急權力迂教化聖人俎豆之區往往苟簡狼籍自元貞初縣陞州後廟制不加舊棟宇乍修乍圯不能支十年二十年之久侯以為病明年秋且大有民和而寇平又適當聖天子詔下申飭臣工勿以寇攘害文教遂與同知高昌和侯州判何君暨校官朱孔昭氏計議學事簿書之計得羨貲若干緡旁率好義之士林仁王文麟黃澤助資各有差首治大成殿增剏挾殿若干楹



撤舊兩廡重築崇挾屋凡若干楹前後側廡及儀門周垣廢各以次舉從祀諸像易繪以塑衣冠采章悉合古制爵尊簋簋之物各極齊潔廟有雅樂廢已久遇祀日旋集市井伎夫玩為故常侯從博雅者復理古樂隸樂胥凡三十六人儀容古茂音律諧暢而昔之規制庠下禮度綿絕者不作矣海鄉之民扶負而至仰見吾聖人王者之宮南面之位而又俯聽吾侯文告之誠雅樂之設無不忻忻然有喜色思見太平以還絃歌之化殆不

勞以威力驅矣侯之為州其得治本如是既乃躬率執事弟子員行釋奠禮于庭竣事州人士相與立石志侯績幸吾子有以書之余曩以公事抵吳下聞侯主辦大府科需皆井井有法少間即究心學事人始難之曰自吾吳遭兵火之變守城社者不啻逆旅人之居談詩書者揀死不瞻顧欲務不急于此乎侯以為民可一日無食不可一日無名教無名教其號為民者安在哉嘻馬上過魯者急祀孔子軍興于譙者亟令修學而侯于供

億繁擾之秋完葺黌廟罔敢一日後其知先務之急者  
乎噫侯之學于聖人者在是而不在彼也審矣侯名良  
弼字仲賢大名人和侯名知尚字仲瑄何君名演字伯  
夫與侯同心而合德校官字用晦寔能職教以贊侯之  
為治者也銘曰皇皇神聖立經陳紀我昏以覺我亂以  
理海東之荒大邑是疆聲教所暨孔廟將將旅楹既闢  
陟降有奕軌磬管笛神聖來假神聖奏假吾侯燕喜允  
矣郭侯治有本始鄰寇震迫不難不驚迨寇既平絃誦

鏘鳴入禮堂上出教堂下寔維民師豈維民父允矣郭  
侯教民以時厥銘在庭四方其訓之奉訓大夫江西等  
處儒學提舉會稽楊維禎撰

尊經閣記

陸鉞

成化甲午莆田林君正奉命按江南四府以來臨嘉定  
既視事謁于先師孔子退而詣學考賢問德已復環觀  
四俯慨維朝廷賜書所以嘉惠承學而於變烝黎者其  
風移俗化固已默有成效然所以尊寵而昭示之者略

無等威甚無以稱上開示匡直之意為之不自寧者良久因進官屬而商諭之以茲邑為蕪之上縣而承宣昭布之意尚未有成非有司之缺典歟今即欲斂財計日以速乃事恐太傷迫以為民勞請姑俟之明日讞諸訟繫獲非其情怙終者令收贖凡得贖緡若干曰可以有為矣當是時適閭陽吳君哲自進士來令茲邑嘆曰是惟林君宣揚布道明示意向覃恩廣被之嘉猷也哲承之至此雖無所先且弗敢緩況林君先之哲何敢後哉

遂以其貨市材鳩工以其部民徐冕劉奕護其事不戒以乎始工于是歲四月丁巳成于冬十一月甲子凡八閱月為楹者三掖者二高七尋深損五之一廣益五之二五分其高閣之上得二分焉為梯二重繚以闌楯暢以軒櫺遠而望之岸然偉麗入之青碧炫爛而上窈然無窮頃之然後出高明俯城郭墟市之民川河之舟送迎之客皆若畫然蓋勢高故視物微眇誠一佳境也畢政務之繁興言邁之樂仰遺言于經帙發奧義于英髦

倚衡攀橈而盱目四視豈不有以宣暢優游而遺底滯  
哉夫古之為政者草衣木食結繩而治其事遠矣方是  
時不以忠孝為美談非有慕而為降此則以仁為愛以  
義為宜以賞罰為勸懲而勃然興起然各在于其人之  
身非可矯飾懲勸之而莫喻賞罰之而莫覺是其習之  
久而性之難擾也于是乎言之諄諄書之浩浩至夫仲  
尼文字彰矣約之為六經侈之為諸子天地之秘聖人  
之奧盡于是矣及我列聖繼治憂患惟深綸言焜煌詔

告無已蓋順時為治而不能有忘于言也茲邑被化百  
年衣冠禮樂日新月盛其涵濡沾溉之功儒生學士固  
已欽仰而佩服之矣至于鄉鄙之民風行草偃飽德而  
歌雖其身之納于平和至靜之域而誠昧于帝力豈非  
所謂百姓日用而不知哉林君為此祇作而新之以動  
民之觀吳君承休繼美始終而弗遺所謂成厥功者二  
君有焉翰林院修撰承務郎郡人陸鉞撰

重修學舍記

王鏊



學在縣治之東南右距通衢左距河橫瀝也前有土山  
松柏鬱然而河水縈之蘓之俗以文勝而嘉定獨簡遠  
樸茂然其秀民長材往往穎銳傑出名天下見于科記  
可攷也學屢有興廢大成殿明倫堂則成于前知縣事  
龍侯晉兩廡則令選部白君思明尊經閣則令御史吳  
君哲而諸生獨無所肄至河間劉君翔之作縣也摧奸  
撫良振廢舉墮嘗行學舍喟曰身之不庇學于何有乃  
召匠經始左即河右即廡列屋若干楹壁其前以為暗

憲其後以為明樓其上以為爽閨曰暗吾欲其謝乎外  
明吾欲其便于業爽閨吾欲其講誦之餘以縱眺其心  
目時成化壬寅九月十日也民不知勞士用競勸于是  
教授李君長源來請曰願君記夫劉侯可謂知治者也  
然吾有問焉侯之所以拳拳新是學者何也所以勸學  
者之學而其所以學者何也無乃挾策而誦乎分題而  
講乎授簡而書乎是三者今之所謂學也而學之道不  
止是茲其淺也有深者焉其小也有大者焉夫人之所

以學者固將行之于身措之于家國天下其平居所講者則皆彛倫物理之常變天地陰陽造化之精微禮樂術數損益因革經世之具學成而用之則為名臣不用則為名人而豈若今之學哉夫今之學校古之學校也今之人才非古之人才矣則所以學者異也雖然亦為之而已矣夫昔之庠廩是學也忽而高明爽闇猶是學也況所以學者哉故曰亦為之而已矣學校人才所從出風俗所由始也不加之意可謂知治乎加之意顧務

其小而忘其大務其淺而忘其深可謂知學乎劉侯可謂知治者也余獨恐侯之新其學而所以學者尚循其舊也故進之然予固亦循乎舊志乎新則未能者也翰林院編修文林郎郡人王鏊撰

儒學應奎山記

龔弘

詩曰既景乃岡相其陰陽書曰卜澗水東瀍水西自建邦國都鄙以下咸負毗名山大川為固若山之可築川之可濬乘其周覽未整翼者為之此裁成輔相之功亦

聖人所不後嘉之烝黎賢貨甲吳郡維人才恒不勝他  
邑自宋寧宗嘉定中學隨縣設留光寺適抗前方莫能  
奮步撤去遺吾道之蝨是故有宋及元人材間出我國  
朝天順間邑令吉水龍晉始築山障之人材為之一盛  
閱今五十餘祀雨崩土湮山日就卑科目因之又由盛  
而衰士居常懷憤力莫之能今年春仲進賢饒公塘持  
憲節至邑曰山學之設也迫甚非宜遷置南許四十尋  
則學宮高顯寺幾退隱委伏此明彼障吾道興焉屬邑

令涿鹿陳侯淵挈其綱邑丞濟南李均延齡綜其事檢  
公帑羨餘售工役財力不費于民李均觸盛暑率衆赴  
事起故積培新壤築其北加闢增以崇高而漸殺其巔  
雖汗浹背衣弗倦功速就緒甫及三旬其趾綿亘餘二  
十丈深一十丈崇高如深二之一視舊倍其五岡勢蜿蜒  
分五嶺構竒峰低昂樹之中峰起自沈氏義塾宋時  
物也先是鄉人夜異其有光久之莫之省神靈豫為默  
相若此山之前濬河縈迴東瀦練祁源水候山澤以通

氣河之上架木梁陟山麓作游息亭潁河得故山空地  
為射圃徑百步宜縱矢力圃西感民居市其地益之構  
觀德亭廣廡崇階可以上充于揖讓下周于步武其外  
薄櫺星門大通衢舊限以垣今易之以闌楯中伐礎為  
棟作綽楔門顏山之名與櫺星對峙由是乾象坤勢山  
高水深土膏毓秀靈化潛融巍然為一望宗士折旋出  
其下可以游息可以喜好可以登泰山知道在于邇功  
成一簣早夜淬礪景出為王乂士則與詩節南山者宜

載形諸歌誦雖然饒公由厥翁已以進士傳家為名御史綽有風紀贊天子崇教化以啟來學陳侯臨位未幾務理政優先正禮門康濟斯美李均常築城禦海寇安民茲能協意同符君子謂饒公貽遠之謀興三百餘年之缺典顧不偉歟山之考極相方自北徂南見出吾儒理有不容遏者視愚公宮翊與堪輿家所謂大逕庭焉科目之曠于往初盛自今茲孰不曰此山始時訓導區福典教陳侯乃相與謂嘉士登科肇宋龔識弘識之後



嘗游學于斯偕李均典史陳潔合辭以請故忘其不逮  
強為之記云

儒學重築應奎山記

都穆

嘉定縣學之南有一山焉名曰應奎蓋天順間築于縣  
令龍晉歲久頽圯前御史進賢饒公塘巡歷至縣嘗命  
改築叅政縣人龔公弘寔為之記正德己巳莆陽李公  
廷梧以才御史出按吳中聞縣有淫祠立命毀而市之  
謂山迫于學且乏崇廣瞻視弗稱乃以市價歸學為修

築費俾縣令涿鹿陳侯淵總其綱而其事則專委縣丞  
清泉王侯輓董之王侯既市民隙地以廣其址遂移山  
稍上西南十有四武其崇視舊六尋有二尺修加如崇  
之數廣加二深有三尺復建二亭其在山之東南者可  
以俯瞰橫澀其在中峰之西者可以觀射山之北為杏  
壇面西為射圃亭樹以綽楔而山之前復為亭二東西  
並峙以寘乎碑其下則鑿而為池跨之以梁以通往來  
漫山雜植檜柏松桂千數百本垣于山之西南餘六十

丈池之南復疊石為山以相輝映工始于九月三日僅  
兩閱月而訖初王侯之經畫是山也予適留嘉定見其  
殫心竭慮罔憚勞瘁是以成之之易而士之游于斯者  
欣忭賞歎莫不頌李公之政而嘉王侯之不負所委也  
抑聞之龍令之始為茲山鄉試一科而連登者七人進  
士一科而連登者三人邑中至今傳為美談謂設學以  
來之所未有夫人材之生世未嘗乏上之人能作興鼓  
舞則感奮景進不然則不免沈晦寥寂此勢之所必至

者令李公于學而作興若是安知今日之科目不有符  
龍令之故事者乎又安知其盛不有過之者乎然則李  
公之功當久而不忘而王侯之名亦將附此而不泯矣  
教諭鄧君樸訓導區君福張君相偕來請記云將勒諸  
石以示永久李公予進士同年且厚善而學校之事固  
予之所樂道也遂不辭而記之承德郎南京兵部武庫  
清吏司主事郡人都穆撰

吳都文粹續集卷六